

Таже Господи, воззвах, во глас 1. И поставим стихов 8.

Поем же стихиры воскресныя Осмогласника три, и от стиховны едину.

Воскресны, глас 1:

1. Из глубины воззвах к Тебе, Господи,/ Господи, услыши глас мой.

2. Да будут уши Твои/ внимлюще гласу моления моего.

Вечерняя наша молитвы/ прими, Святыи Господи,/ и подаждь нам оставление грехов,/ яко Един еси, // явлей в мире Воскресение.

3. Аще беззакония назриши, Господи, Господи, кто постоит;/ яко у Тебе очищение есть.

Обыдите, людие, Сион/ и обымите его,/ и дадите славу в нем Воскресшему из мертвых:/ яко Той есть Бог наш, // избавлей нас от беззаконий наших.

4. Имене ради Твоего потерпех Тя, Господи, потерпе душа моя в слово Твое,/ упова душа моя на Господа.

Приидите, людие, воспоим и поклонимся Христу, славяще Его из мертвых Воскресение: яко Той есть Бог наш, от лести вражия мир избавлей.

5. От стражи утренния до нощи, от стражи утренния,/ да уповает Израиль на Господа.

Страстию Твоею, Христе, от страстей свободихомся и Воскресением Твоим из истления избавихомся: Господи, слава Тебе.

Ины стихиры самогласны, Великия Субботы три, повторяюще первую,

глас 8:

6. Яко у Господа милость и многое у Него избавление:/ и Той избавит Израиля от всех беззаконий его.

Днесь ад, стена, вопиет:/ уне мне баше,/ аще бых от Марии Рожденнаго не приыл:/ нашед бо на мя, державу мою разруши,/ врата медная сокруши:/ души, яже содержах прежде, Бог сый воскреси. // Слава, Господи, Кресту Твоему и Воскресению Твоему.

7. Хвалите господа вси языцы,/ похвалите его вси людие.

Днесь ад, стена, вопиет:/ разрушися моя власть:/ приях Мертваго яко единаго от умерших,/ держати же Сего отнюдь не могу,/ но погубляю с Ним вся, над нимиже царствовах:/ аз имех мертвецы от века,/ но се Сей всех воздвизает. // Слава, Господи, Кресту Твоему и Воскресению Твоему.

8. Яко утвердися милость Его на нас,/ и истина Господня пребывает во век.

Днесь ад, стена, вопиет:/ поглощена бысть моя держава./ Пастырь распятся и Адама воскресі:/ над нимиже царствовах, тех лишихся,/ и яже поглотих возмогий, всех извергох./ Истоци гробы Распныйся,/ изнемогает смерти держава.// Слава, Господи, Кресту Твоему и Воскресению Твоему.

Слава, глас 6:

Днешний день таинственно великий Моисей прообразоваше, глаголя:/ и благослови Бог день седмый./ Сия бо есть благословенная Суббота,/ сей есть упокоения день,/ воньже почи от всех дел Своих Единородный Сын Божий,/ по смотрению на смерть,/ плотию субботствовал:/ и еже бе, в то паки возвращая,/ воскресением дарова нам жизнь вечную,// яко Един Благ и Человеколюбец.

И ныне, Богородичен, глас 1:

Всемірную славу,/ от человек прозябшую/ и Владыку рождшую,/ небесную дверь, воспоим Марию Деву,/ безплотных песнь и верных удобрение:/ Сия бо явися небо и храм Божества:/ Сия, преграждение вражды разрушивши,/ мир введе и Царствие отверзе./ Сию убо имуще веры утверждение,/ поборника имамы из Нея рождшагося Господа./ Дерзайте убо, дерзайте, людие Божии:/ ибо Той победит враги,// яко Всесилен.

Вход с Евангелием. Свете тихий: Прокимен не глаголем, но абие: Премудрость. И начинает чтец чтения.